

Monumenten Bureau lo muda temporalmente

Mas cu 500 mil florin pa restaura edificio monumental Henriquez



ORANJESTAD – Cu un suma entre 500 mil pa 620 mil florin e edificio monumental conoci como Edificio Henriquez -unda actualmente Monumenten Bureau ta funciona- lo pasa den un proceso di restauracion cu lo tarda entre 6 pa 8 luna.

E inversion aki a bini di fondo di Stichting Monumenten Fonds, un fundacion cu ultimo añanan a inverti den restauracion di varios monu-



mento rond di nos isla. Por cierto e acto di firmamento aki a wordo realisa ayera, riba mesun fecha cu e directora di e fundacion aki, Anne Witsenburg -de Jong a celebra su cumpleaños.

E compania encarga cu e trabou aki ta Eco-Aruba Line Development, un compania di construccion y real estate estableci pa 4 aña caba na Aruba, pero su oficina principal ta na Venezuela; y cu a gana e destaho publico. E trabou aki a wordo oficialisa cu e firma di e contract cu a conta cu e firma di minister di Cultura, Otmar Oduber, Presidente di e directiva di Stichting Monumenten Fonds, sr. Roly Sint Jago; tambe sr. Kamilo Mousalli di e compania Eco-Aruba Line Development y Yvonne Webb-Kock di Monumenten Bureau.

Mantenion monumentonan

Minister Otmar Oduber ta considera importante e hecho aki, ya cu mantenion di nos monumentonan tin un prioridad pa gobierno. El a laga sa cu actualmente nan ta bezig cu diferente consejo a base di un encuentro cu nan tabatin na Hulanda, pa por mehora e funcionamiento pa sigui promove y curasha comunidad di Aruba y sector priva, pa inverti y mehora situacion di nan edificacion monumental.

Roly Sint Jago a expresa su satisfaccion di por a firma e contract aki despues di varios luna di preparacion. El a bisa cu un acto asina solamente ta posibel danki na e confiansa cu nan por yega na dje durante e ultimo cinco añanan. "Nos ta haya cu nos a haya e confiansa di gobernacion; pero tambe instancianan financiero cu tin tanto confiansa den e fondo", sr. Sint

Jago a bisa.

El a agrega cu e fondo di e fundacion pa inverti den nos monumento ta danki na fianza di instancianan di afo manera Restauratie Fonds di Hulandes, cu ta ofrece nan credito na un interes abou. Na final el a declara cu un joya monumental manera edificio Henriquez "ta bay haya un bida nobo". El a haci un apelacion como Monumenten Fonds pa nos comunidad ta mas consciente di nos herencia cultural, y pa nos por yuda cuida locual ta di nos pa nos descendencia.

Restauracion y mudamento

Aunke e compania Eco-Aruba Line Development lo realisa e trabou, esaki lo wordo realisa bou guia di Monumenten Bureau. Sra. Webb-Kock a considera e acto aki como uno "historico y emocional" pasobra nan oficina lo wordo drecha. El a gradici gobierno cu a aproba pa Monumenten Bureau mes -ora di mantenion di edificio di gobierno so- nan mag di prepara nan mes proyec-tonan y pinta nan.

El a laga sa cu esaki ta e prome biaha cu e compania Eco-Aruba Line Development ta bay haci un restauracion. El a bisa cu e ta kere cu tur hende mester haya e oportunidad pa nan siña e parti dificil di restauracion. "Mi ta spera cu nan por cumpli cu tur e bon trabou cu nos ta exigi", el a bisa.

El a participa cu debi cu edificio Henriquez lo pasa den un trabou di restauracion den e proximo 6 pa 8 luna, Monumenten Bureau situa den e edificio aki, lo bay muda na otro edificio yen di historia cerca di gabinete di Gobernador. E ta otro edificio cu Monumenten Fonds ta huur, esey na Pico La Marina net patras di Zoutmanstraat.

Di su banda sr. Mousalli di Eco-Aruba Line Development a declara cu su compromiso y esun di su team di trabou ta cla pa cuminsa traha; y asina nan por cumpli debidamente cu e plan cu a wordo stipula. □